



“MARŠ MIRA - NEZUK - POTOČARI 2021.”

“Marš mira” je memorijalna manifestacija koja se održava svake godine, u julu, u povodu obilježavanja godišnjica genocida nad Bošnjacima “Sigurne zone Ujedinjenih nacija” u Srebrenici iz jula 1995. godine.

Cilj ove manifestacije jeste odavanje počasti bošnjačkim žrtvama genocida iz Srebrenice koje su na zvjerski način i masovnim likvidacijama ubijene u julu 1995. godine, prilikom okupacije i zauzimanja Srebrenice od strane vojske i policije Republike Srpske i Republike Srbije.

Pored odavanja počasti žrtvama genocida, ova manifestacija ima za cilj i da animira sve relevantne, međunarodne i domaće pravosudne institucije da procesuiraju i što prije, pred lice pravde, privedu i presude, sve osobe koje su učestvovale u planiranju i izvršenju zločina genocida nad Bošnjacima u Srebrenici.

“Marš mira” ima za cilj i izgradnju, unapređenje i njegovane kulture sjećanja na genocid nad Bošnjacima u Srebrenici te da onemogući negiranje, poricanje i reaktiviranje zločina genocida koji se uporno i sistematično nameće i zagovara od strane predstavnika srpskog naroda, institucija Republike Srpske, Srbije i njihovih istomišljenika.

“Marš mira” je jedna od najmasovnijih, najbrojnijih i najzahtjevnih aktivnosti u okviru obilježavanja godišnjica genocida, sa međunarodnim karakterom i učesnicima iz mnogih zemalja svijeta.

Ova manifestacija uvrštena je u program obilježavanja godišnjica genocida 2005. godine i broj učesnika se povećavao svake godine sve do pojave pandemije COVID-19. Broj učesnika u proteklim godinama, prije pandemije koronavirusa, se kretao od dvije do preko deset hiljada.

“Marš mira” traje tri dana i učesnici pješaće na stazi dugoj oko stotinu kilometara od Nezuka do Potočara. Ovom stazom u suprotnom smjeru, od Potočara do Nezuka, su se u julu 1995. godine izvlačili i probijali Bošnjaci prilikom okupacije i zauzimanja “Sigurne zone Ujedinjenih nacija” Srebrenica od strane srpskih vojnih i policijskih formacija.

U toku pješaćenja od Nezuka do Potočara, Organizacioni odbor u saradnji sa prijateljima i ostalim relevantnim institucijama, ustanovama i organizacijama u BiH za učesnike “Marša



mira” obezbjeđuje šatore za prenočište na tri lokacije Liplje (Zvornik), Đugum (Bratunac) i Potočari (Srebrenica), medicinske ekipe i pomoć, vodu, sokove, voće...

Učesnici “Marša mira” dnevno pješače oko 30 kilometara i na određenim mjestima staza je izuzetno naporna, nepristupačna i zahtjeva solidnu fizičku spremnost od učesnika.

Organizacioni odbor svake godine za učesnike “Marša mira” priprema program kulturno - historijskog karaktera kojim se u mjestima prenočišta i u toku pješačenja, na karakterističnim i značajnim lokacijama obezbjeđuju svjedočenja od strane preživjelih marša smrti iz jula 1995. godine, kao i dokumentarni filmovi na temu genocida.

Za učesnike “Marša mira” Organizacioni odbor nije u mogućnosti obezbjeđiti ishranu tako da svaki učesnik treba da se obezbjeđi sa hranom u toku pješačenja.

Kolonu “Marša mira” svake godine predvode veterani koji su uspjeli preživjeti put smrti i zločin genocida iz jula 1995. godine.

Svi učesnici obavezni su poštovati Kodeks ponašanja za učesnike “Marša mira” i preporuke Organizacionog odbora koje se nalaze na web i fejsbuk stranici “Marša mira”.

Učesnici “Marša mira” nakon dolaska u Potočare imaju priliku i mogućnost da 11. jula prisustvuju komemoraciji, dženazi i ukopu identificiranih žrtava genocida, pronađenih u nekoj od masovnih grobnica sa lokaliteta kojima su i sami prolazili u toku pješačenja.

U okviru obilježavanja 26. godišnjice genocida nad Bošnjacima „Sigurne zone UN-a“ Srebrenica biće organizovan 17. po redu „Marš mira“, a u toku su prijave za učešće organizovanih grupa/pojedinaca.

Rok za prijavu na ovogodišnji “Marš mira” je 01. juli 2021. godine za organizovane grupe, a za pojedince do dana polaska. Prijave za učešće na „Maršu mira 2021.“ mogu se izvršiti slanjem podataka na e-mail marsmira@gmail.com ili putem web stranice <https://www.marsmira.net/bs/>, kao i FB stranice Marša Mira <https://www.facebook.com/mars.mira> najkasnije do 01.07.2021.godine.



Iskreno se zahvaljujemo svim organizovanim grupama i pojedincima koji su učestvovali u prethodnom periodu u „Maršu mira“.

Ovim putem se zahvaljujemo i svim institucijama, ustanovama, organizacijama i pojedincima koji pružaju nesebičnu podršku u organizaciji „Marša mira“

NAPOMENA:

Sve aktivnosti Organizacionog odbora za obilježavanju 26. godišnjice genocida nad Bošnjacima “Sigurne zone UN-a“ Srebrenica će biti održane u skladu sa epidemiološkim mjerama, koje budu propisane od strane nadležnih institucija.

Imajući u vidu naprijed navedeno, molimo sve prijavljene učesnike za “Marš mira” 2021. godine da budu spremni na, eventualne redukcije i smanjivanje broja učesnika, ukoliko to bude potrebno.

S poštovanjem,

Predsjednik Podobora za “Mars mira” 2021.

Zulfo Salihović